

聶氏家庭集益會記錄

民國十六年十月

聶氏家庭集益會記錄

實價洋一角五分

著者 聶其杰

發行者 上海遼陽路
聶氏家言旬刊社

總代發行所 中華書局

寄售處 商務印書館

聶氏家庭集益會記錄

第一次聶氏家庭集益會記錄

丙寅年九月十八日三時。在上海遼陽路崇德堂宅。開家庭聚會。與會者。老太太 雋威及二太太 雲台 六太太 七太太 慎餘 少萱及十一太太 光堃夫婦 炎少奶奶 潞生因應酬。十太太因病均未到。

雲台報告聚會之宗旨。略謂家庭和睦。與家運振興。均要在大家同心同德。互相勉勵。以時聚集。各抒意見。集思廣益。此會之所由召集也。其杰懷抱此志已久。迄未得有機緣。今新居落成。各房聚居一處。氣象一新。尤應及時振奮。有作新之表示。對於家事。則應有具體之規畫。積極之設施。對於家庭教育。亦應明定宗旨。與以切實指導。弟姪後輩。均有賴於老成之指導。俾得時聆訓勉之言。改正其浮泛之感情。誤謬之觀念。如此類事。萬端待理。其杰德薄能鮮。惟有惓惓之忠。掬以自效。至於見諸實施。仍賴衆擎共舉云云。

次宣讀集會大綱。略謂此會成立。以後按期舉行。自應略有組織。以爲依據。並有記錄。以備考按。茲擬數條如下。

家庭集會大綱

命名 家庭集益會

定期 星期日下午二時半

會所 遼陽路崇德堂宅

職員 設幹事一人。記錄會議言詞。執行議定事件。

議事 以道德禮義爲標準。不取法定章程之完密。議決事項。當然以大多數取決。然必期大家明澈諒解。齊心合德。凡事不求勉強執行。若有事關大計。爲會員中老成者所主張。多數所可決。衡以聖賢古訓。先德典型而皆當者。則不以少數反對而輒止焉。

商議事件 分家政家教兩大端。家政包括家計。爲互謀自勵自約之法。家教則謀訓約後輩子姪之道。其屬於家計事項者。別分條目。另設委員會議處理之。

又言所定應設幹事一人。其杰意以此自任也。因請各位商定會之名稱。雋威言家庭集益會名稱甚佳。餘亦無須更改者。此種會重在精神不在形式也。次請 老太太訓示。

老太太諭云。汝所言甚是。欲家運振興。此爲切要之務。卽如十一兒讀書做人。亟應奮發圖新。二兒能爲之講書甚妙。昔者文正公晚年。公務極忙。猶每夜課子講書也。

雋威言。予甚贊成此會之設立。望大家合力互助。以圖家事之振興。講書事亦願擔任。

慎餘言。此種集會。不但使我輩得發表意思。並應使幼輩各人發抒言論。庶得知其志趣。思想而施以相當之訓練。

七太太言。在學堂諸兒童。歸家時。應令與會聽講。學堂中無機會聞此等教訓也。

雲台言。關於家政家教之準繩。莫善於文正公之八本。其杰已撰一文。說明八本之意義。因略述其大旨。並言願躬行早掃二字。爲子弟倡率。又擬以衣履二字代魚豬。因居城則魚豬二字不適用。此仍爲師文正公所定婦女課程單衣食粗細四字之意。其詳見於拙作八本堂說。茲不贅記。

談話共一小時有半。由光堃婦治點心。供衆食畢。盡歡而散。

第二次家庭集益會記錄

丙寅九月二十五日開第二次會。與會者。老太太。雲台。率光堃夫婦。潞生暨六太太。

及兩兒。七太太及兩兒。慎餘及兩兒。少萱暨十一太太。張姑太太及諸兒。周姑太太。曹姑奶奶。來賓曾七太太。曾昭掄。計共二十五人。

雲台讀雋威來條言友人預約不能到會。惟本會公議事件。昌願盡其所能遵守推行。近來見各處兵燹之慘。餓死之多。以爲劫禍之來。不能幸免。惟有切實修德。各自懺悔。願每月逢九吃素三日。餘日亦決不特殺生。至於衣服。除原有者外。決不再添製綢面。卽呢絨亦取其廉價者。非獨惜財。實以惜福。冀稍盡我心。勿更增咎戾也。

老太太言。有此極好表示。較之親到尤佳。會衆聞者。皆欣然。雲台言。前次開會記錄。已載於旬刊。今日擬更申述八本堂之意義。其說亦具載旬刊。請各自閱覽。惟該文尙有未盡之意。茲更略述之。(一)屬於考字者。除祭祀之外。須詳知祖宗德行學問事業。如七世祖樂山公盛德碩學。曾祖七兄弟之學問科第。祖父之文章政績。吾父之孝友任卹。吾母之慈懷厚德。施濟不倦。偶一講述。使後輩聞悉。必能感激奮發。頑廉懦立。大凡能讀一國之歷史者。必富於愛國之心。能詳知祖宗之德行事跡者。必篤於孝友之情。故講述家譜。亦爲要事。茲擬後輩能讀書者。各發給家譜一部。下次並擬擇要講述焉。(二)關於寶字者。文正公述星岡公之言曰。人待人。無價寶也。此卽仁親爲寶之意。亦卽包括對一切人服務盡力也。(三)關

於早字者。一切事之振興。均有賴於早起。清朝皇家家法最嚴。皆寅時起身。故歷朝皇帝無荒淫怠惰者。其效甚著矣。文正公述星岡公上下數代皆未明卽起。足知開國成家。皆以早起爲第一義。然欲早起。尤須從早眠注意也。(四)掃字包括一切服勞之事。却須從掃字做起。須將掃帚糞箕抹布設置於隨手易取一定之處。視爲重要之物。又教子弟服勞。須從代長輩盛飯做起。宜定日練習以期實行。以不恥卑下。不憚勞役。不嫌汚手爲主。昔文正公身爲將相。猶函令子弟勿呼僕人泡茶水。又言須教諸兒練習走路。勿坐轎騎馬。諸女勿嬌嬾。宜學燒茶煮飯。又言子姪除讀書外教之掃屋抹桌檯收糞鋤草。切不可以爲有損架子而不爲也。云云。此數言須常爲家人子弟講述。因述報紙所載長沙厨工會條件以警衆。謂值此潮流。宜求自立。習勞崇儉。固屬本分。亦爲免嘔氣之道也。其餘四字。具詳說中。不復贅次。請 老太太訓示。

老太太諭云。汝所言者甚足。今要在施諸實行。並諭囑雋威定期爲少萱講書。其他各事。均須實施。勿以空談爲止。

潞生言。渠教諸兒。均以養成其自治能力爲主。凡小孩斷乳後。卽不宜用專人撫育。渠有六孩。共用一女工一婢而已。近日聞一廠友言。其十餘歲孩尙不能自著衣服。殊爲可歎。渠之

諸孩。則七歲皆能自著衣洗臉。自盛飯也。又言欲對人服務。且先教其做自己之事。須從少用僕人做起。社會生計日趨艱難。驕惰習慣。必須及早革除。以免後悔。用人少既可節省開支。又可練習勤勞。願大家勿漠視此言。

老太太言。六兒所言皆確當。六兒婦之能少用僕婢。又能自操勞以撫育多孩。此家人所共稱許者也。

雲台言。六弟夫婦此事極可佩服。潞生所言。不獨爲家人所應照行。且可登之旬刊爲社會勸也。

雲台言。古人教學皆有法則。王陽明訓蒙教約一篇最佳。其中注重歌詩習禮二者。習禮不獨禮節儀文。凡習行應爲之事皆當包括在內。歌詩則尤使人感興。故本會師其意。每次必誦詩歌以鼓起興趣。其詩歌卽用陳文恭公所選者。今日唱緹縈救父木蘭從軍兩詩。遂領會衆同唱。大衆均顯高興之狀。氣象極佳。兒童多人。自始至終皆注意靜聽。無嬉戲怠惰者。足徵其能領畧其意趣也。三時四十分吃點心散。

第三次家庭集益會記錄

丙寅十月初三日第三次家庭集益會與會者。老太太。雋威。雲台率光堃夫婦。五姑太太率諸子女。六太太率三女。七太太率三男。慎餘率諸子女。少萱及十一太太。光均夫婦偕弟妹。曹姑奶奶。來賓會七太太。共二十九人。

雲台先將慎餘之兩兒所學撰前次集會記錄。讀與大眾聽。頗引起興趣。

次正式宣讀前次記錄。讀至雋威言逢九吃素一段。雲台言現各房逢九實行吃素者已居大多數。極為可喜。蓋吃素爲對貧苦及被災難之人表同情。亦對各種生物表同情。包括親仁民愛物之意。仁心之發動。由此而起。則其致祥和吉慶。有可決矣。

次雲台言今日即繼續前次所講而謀施諸實行。茲擬定辦法數條。名曰自治服勞之習練。茲錄如次。

自治服勞之習練

凡事須有一起頭。故須預定一日爲實行之始。星期日兒童多從校歸。故可定是日實行。名爲自治習練日。

凡事起首甚難。大抵有怯羞之意。故須大家勸勉鼓勵。又須定一章程。則行之較易。且須從簡易者做起。

茲擬定數條如下

一男子須習掃地抹桌檯。一堂屋。二其母親室。三自臥室。桌檯外。兼抹玻璃。

一女子須習開飯時擺桌檯碗筷。食畢洗碗筷。如僕婦在桌續食。並候其食完後揩抹桌子。如地板狼藉。兼須掃地。并謝絕僕婢之幫助。

一女子須習自己梳頭結辮。梳熟後平日即完全自梳。是日飯時不令婢媼在旁招呼。長輩飯歸幼輩盛。幼輩則自盛。兼代來客盛飯。太幼者不能盛飯。則由長兄長姊代盛。飯畢泡茶送茶。亦照此行。此層雖覓在星期日習練。漸宜日日推行。平時泡茶等事。慣使用人者。宜注意改革。

一女子須學做菜蔬點心。亦可於是日習練。如無暇則可於平日習之。

一女子須習練洗濯自己衣服。早間洗好。自行晒晾。夜間已乾。即用熨斗運平折疊。

一爲父母者。是日宜督率子弟早起。照此單實行。並以文正公訓子弟之言。如教子姪婢及須學拾糞鋤草。掃地抹桌。女子須學燒茶煮飯等語。常爲子女講說。須明白孔子所言愛之能勿勞乎。忠焉能勿誨乎之意。勞即做此等事。誨即教此等事。勿溺愛。謂愛之而不勞。勿姑息。如子女愚鈍。不了解此等也。並於其服勞時。在旁指導。教以合宜方法。又於家庭聚會時。報告其成績。以資策勵。

因將各條講述一遍。並言內中課女子之事較多。未知可施行無礙否。請各位發表意思。

老太太言各條尙無繁重難行者。當可實行也。

六太太七太太均言所擬辦法甚善。願照施行。

老太太言近日勞工運動甚激烈。賴人服役。日後甚難。當預爲之備。凡事須能自助。無待於人。庶將來不感困難也。

雋威言。予數年來。皆自己盛飯。今已實行自己掃地矣。又言前清吳蕙吟侍郎。兼充總理衙門大臣。性節儉。灑掃之事。均自爲之。時人戲呼之爲掃地侍郎云。

雲台言聖賢之道。不在高遠處。只在極庸常處。孝友親仁。洒掃應對。何等庸常淺近。止此卽是聖賢工夫。所以孔門所教在此。文正公所教亦在此。聖賢均欲教人爲聖賢。而所教不過如此。我輩從可知所致力矣。

老太太詢問雋威爲少萱講書事。雋威言已於昨日起講。每日四時至五時。星期日亦可講。餘無討論。雲台卽領會衆及諸兒童。共唱遊子吟。哀王孫兩詩畢。食功德林之素包子。盡歡而散。

第四次家庭集益會記錄

十月初十日第四次家庭集益會與會者。老太太。雲台率光堃夫婦。四太太率炎少奶奶及三孩。潞生及六太太。七太太率兩孩。十一太太。光堃及愼餘之子女三人。五姑太太子女四人共二十三人。本日適愼餘三十整生日有客。各房多有至其寓作賀陪客致未克到會者。

雲台先讀光堃學作開會記錄。文甚清通。次讀正式記錄。

雲台言今日係實行自治習勞之第一日。各人應出示成績。予之成績。卽老太太房間之玻璃窗是也。卽將窗打開。以見內外兩面皆潔淨。衆頗嘉悅。又言添飯泡茶。亦由光堃婦實行。因詢在座各幼輩有無實行。各孩童皆言已實行掃地抹桌揩玻璃盛飯等事。大衆均極高興。

雲台言今日開會較遲。致所預備之講題。不能多講。今當略講清聖祖卽康熙皇帝庭訓格言中關於勤儉者數條。足見聖祖不但是好君。實真是聖賢。其仁德直上追三代。三代以下。漢文帝唐太宗外能比之者甚鮮。因述數條如下。

訓曰。世人皆好逸而惡勞。朕謂人恒勞而知逸。若安於逸。不惟不知逸。而遇勞卽不能堪矣。易曰。天行健。君子以自強不息。蓋聖人以勞爲福。以逸爲禍也。

訓曰。嘗謂四肢之於安佚也。性也。天下甯有不好佚樂者。君子則勤修不敢惰。制欲不敢縱。節樂不敢極。惜福不敢侈。守分不敢僭。是以身安而澤長也。書曰。君子所其無逸。詩曰。好樂無荒。良士瞿瞿。至哉斯言乎。

訓曰。朕八歲登極。卽知黽勉學問。至十七八更篤於學。逐日未理事前。五更卽起讀誦。日暮理事。稍暇復講論琢磨。竟至過勞。痰中帶血。亦未少輟。

訓曰。朕自幼讀書。間有一字未明。必加尋繹。務至明愜於心而後已。不特讀書爲然。治天下亦不外是也。

訓曰。各部院本章。朕皆一一全覽。外人謂朕未必通覽。每多疏忽。故朕於一應本章。見有錯字。必行改正。翻譯不堪者。亦改削之。當用兵時。一日三四百本章。朕悉親覽無遺。今日中僅四五十本而已。覽之何難。一切事務。總不可有懈慢之心也。

以上數條。均其訓勤者。

訓曰。朕爲天下君。何求而不得。今朕之衣服。有多年者。並無纖毫之玷。裏衣亦不至少污。若常人能如此愛惜。則凡衣服不可以長久服之乎。

訓曰。老子曰。知足者富。又曰。知足不辱。知止不殆。奈何世人千金之裘。萬錢之食。猶以爲不

足耶。朕貴爲天子。而衣服不過適體。富有四海。而每日常膳。除賞賜外。所用肴饌。從不兼味。此非朕勉強爲之。實由天性自然。汝等見朕如此儉德。其共勉之。

訓曰。我朝外廷軍國之需。與明代略相彷彿。至於宮中服用。則一年之用。尙不及當日一月之多。蓋深念民力維艱。國儲至重。祖宗相傳家法。勤儉敦樸。爲風。古人有言。以一人治天下。不以天下奉一人。以此爲訓。不敢過也。

訓曰。世之財物。天地所生。以養人者。有限。人若節用。自可有餘。奢用則頃刻盡耳。何處得增益耶。朕爲帝王。何等物不可用。然而朕之衣食。毫無過費。所以然者。特爲天地所生有限之財。而惜之也。

訓曰。朕所居殿。現鋪氈片等物。殆及三。四。十。年。而。未。更。換。者。有。之。朕。生。性。廉。潔。不。欲。奢。於。用。度。也。

以上爲訓儉者。

其杰謹按庭訓格言乃聖祖平日訓諸皇子之語。爲世宗憲皇帝所記述成書者。觀其勤與儉之躬踐實行。吾輩乃不能幾及萬一。其他嘉言懿行甚多。茲惟述其關於教勤儉者。又言郭涵齋先生編有庭訓格言類編。現已託其代印百部。一俟寄到。卽每人發一部。

雲台言凡克己愛入。出於真誠者。謂之厚德。如是之人。其遺澤最長。因述先七世祖樂山公。刻苦勤勞。專以濟人爲事。而子孫甲科鼎盛。至吾輩第七世。猶食其報。觀於聖祖之厚德。而知其國祚之所由昌明長久。遠邁前代。良非偶然。而古人所謂厚德載福。積善餘慶之言。益可徵信矣。願各人將庭訓格言。勤加翻閱。互相勸勉。當獲益不小云。

旋由雲台講韓文公之符讀書城南及王建之雉將雛兩詩。已時間已過。卽散會。
老太太諭各兒童讀熟兩詩。下次同唱。

第五次家庭集益會記錄

十月十七日。家庭集益會第五次聚會。與會者。老太太 雋威 雲台率光堃夫婦 五姑太太率諸子女五人 潞生及六太太 七太太率興恒兩兒 愼餘率子女四人 少萱及十一太太 光均夫婦偕弟妹三人 來賓曾七太太。共二十九人。
首由五姑太太出示慶雲和雲所紮紙花籃。頗佳。衆皆嘉賞。次雲台問各人服勞成績。諸兒童各有報告。有人言某太太亦在家實行抹桌橈者。某太太笑而不言。
雲台亦指老太太房玻璃間壁爲己之成績。並言服勞後始知勞力之不易。而能與一般勞

苦工作之人表同情。古人云。勞則思。思則善心生。逸則淫。淫則忘善而惡心生。誠爲確論。次雲台讀上次記錄。又將所引庭訓格言逐條詳講。費時頗長。因各條前雖略講。但寫出後。更有條理。覆講更明。

次雲台領衆唱詩。先講歌詩抑揚高下之法。遂同唱符讀書城南及雉將雛兩詩。聲調響亮。較前數期大有進步。

次講預備下次之歌詩。爲白居易之燕詩及翁森四時讀書樂四首。諸兒童聽之。皆饒興趣。次雲台言今日時間已過。不及多講。惟有數言告大衆者。卽此會已開第五次。各大人小孩均頗踴躍。而對於其杰所主張各事。均贊成實行。極可慶幸。惟其杰所講說所主張。並非出於己見。實皆援引聖賢經訓及文正公遺言。凡諸所言。徵諸事理而有當。問之吾心而可安。且一一爲居家治生立身處世極有經驗之善法。其杰見之甚明。引證有據。見其循是道則家人有遷善向上之望。不循是道則家事家運難期振興。望各位將此點加以重視。回家時細加考慮。如覺其杰所見爲正。所言爲當。則當更進一步。將其杰所主張各事力求推行。此會止七日一聚。若能善體會此意。於平日施諸實行。則此會爲不虛。否則仍同空談。無補於事耳。次請 老太太訓示。 老太太言。爾所言極佳。各兒童須留心記憶。下次須早到會。並

將詩紙誦習。屆時帶來。勿忘。卽食點心散會。

第六次家庭集益會記錄

十月二十四日家庭集益會第六次聚會與會者。老太太 雲台率光堃夫婦 潞生及六太太率一子 五姑太太率子女姪六人 七太太 慎餘率子女三人 光墀 光均夫婦偕弟妹三人 曹姑奶奶 共二十四人。雲台問各人有無成績報告。五姑太太出示慶雲所製繡花針插。衆皆稱贊。又詢各人能講本日歌詩之意否。光堃答述燕詩之意甚詳。足徵其已經留心預備。甚可嘉許。

次雲台讀前次集會紀錄。並申言各人宜自動以振作奮發。此會可譬之於鐘表發條。一經旋上。卽能自動。更可譬之植物種子。一粒種可生出無數穀米。或長成大樹。其杰所講述。皆古人經驗名言。能仿行之。則自能得其利益。否則開會自開會。會完了事。與我全不相干。又如各種經籍善書。汗牛充棟。若不學而習行。則書自書我自我。書多亦於我何補耶。次唱詩。燕詩及四時讀書樂。次講下期應唱之詩。第一首爲陸放翁感事示兒孫。並講前四